

Utilitaristik yondashuv jurnalistikada asosan faoliyatning jamiyat manfaatiga xizmat qilishi va umumiy foyda keltirishi lozimligini ta’kidlaydi¹. Mazkur yondashuvga ko‘ra, to‘g‘ri qaror jamiyat uchun eng katta foyda keltiradigan harakat sifatida belgilanadi. Jurnalistika amaliyotida ayni holat jurnalist qarorini jamiyatning umumiy manfaatlari nuqtayi nazaridan baholashni talab etadi. Masalan, korrupsiyaga oid tadqiqot maqolasi ayrim shaxslarning obro‘sigacha salbiy ta’sir ko‘rsatishi mumkin, biroq u jamiyatda shaffoflikni ta’minlab, adolat va qonun ustuvorligini mustahkamlasa, axloqiy jihatdan oqlanadi. Shu nuqtayi nazardan, jurnalist keng auditoriya uchun ijtimoiy ahamiyati yuqori bo‘lgan axborotni ustuvor qo‘yishi va uning ehtimoliy oqibatlarini baholashi zarur. Utilitaristik yondashuv jurnalistikada jamiyat manfaatini ustun qo‘yish, axborotning ijtimoiy ta’sirini hisobga olish, shaffoflik va adolatni ta’minlash tamoyillarini asosiy mezon sifatida belgilaydi². Demak, utilitaristik yondashuv jurnalistikada axloqiy dilemmalarni rivojlantirish tendensiyalarini tushunishda muhim ahamiyat kasb etadi, chunki u har bir jurnalistik harakatning ijtimoiy oqibatlarini baholash va jamiyat uchun eng katta foydani ta’minlash imkonini beradi.

¹ Saragih M.Y. Law, Journalistic Profession and Mass Media Ethics. Budapest International Research and Critics Institute-Journal (BIRCI-Journal) Volume 4, № 2, May 2021. –P: 2532-2540.

² Reyhels, Djeyms. Elementi moralnoy filosofii. Piter, 2019. –P. 14.